

王文公文集

十六

王叔子集

卷一

王文公文集卷第九十三

墓誌

贈尚書吏部侍郎句公墓誌銘

台州天台縣令王君墓誌銘

太常少卿沈公墓誌銘

尚書度支員外郎郭公墓誌銘

都官郎中致仕周公墓誌銘

贈尚書吏部侍郎句公墓誌銘

公句氏諱希仲字衮臣景德六年以開封浚
儀進士起家歷選於吏部爲揚州江都主簿

洪州新建縣尉權管勾洪州奉新縣事開封
府右軍巡判官其後除於審官爲監黃州岐
亭鎮茶鹽酒稅監虔州稅知洪州分寧縣知
容州勾當在京左右廂店宅務知高郵軍知
岳安表吉筠五州又其後除於中書爲知隨
州又遂以疾求分司西京而以皇祐三年四
月丁亥卒於安州之傳舍享年七十一散官
至朝奉郎職事官至光祿卿勲至上柱國賜
緋魚袋公通訓詁工篆隸書能傳其父學又
善爲詩其在高郵歲大饑以便宜振救所活

萬餘人在鄂州前吏以逃戶諸稅責鄰人至
或無桑矣而猶責其絲公歎曰上恩及於無
告而州縣若此壅之何也即奏除之在吉州
州素多事公至則御之以簡姦吏惡民顧不
得有爲至相與戒云以俟其去奉寡嫂畜孤
兄子尤篤於恩禮自爲郎中先任其兄子次
及諸從最後乃蔭公子兄外孫尹名御幼失父
母公收教之再舉進士禮部矣顧言以名御名
聞名御由此補郊社齋郎蓋其爲人敦厚長者
詳於施人而略於養己如此句氏其先京兆

人公曾祖諱同章始遷成都之華陽祖諱令
瑄皇贈光祿寺丞父諱中正爲孟氏武泰軍
節度掌書記太宗時自潞州錄事叅軍召拜
著作佐郎直史館其後改直昭文在兩館二
十六年同館士多去爲將相而脩職守道未
嘗爲之少屈以尚書屯田郎中卒於眞宗之
初而葬浚儀浚儀今祥符也故公子以某年
某月某甲子葬公開封府之開封縣保安鄉
永寧村公先配清河張氏繼配楚丘邊氏祥
符劉氏封延安郡君三男子諶尚書屯田員

外郎詵早世請太廟室長女子九人嫁尚書
駕部員外郎王正巳湖州德清縣令郭眞卿
尚書虞部郎中楊定殿中丞劉備榮州錄事
叅軍張道古起居舍人龔鼎臣殿中丞杜
師益泰寧軍節度推官謝京登州司理叅軍
王勗及公之葬也以公子諶故張夫人追封
仙遊縣太君邊夫人追封仙源縣太君劉夫
人進封仁壽郡太君而公亦贈官至尚書吏
部侍郎銘曰

句宗華陽世實京兆來家東都公考有廟溫

溫句公有美有相不銜不求卒爲圭璋考翼
在上公承在下爲此幽宮亦浚之野

台州天台縣令王君墓誌銘

君南城人王氏諱無咎字補之嘉祐二年進
士也初補江都縣尉丁父憂服除調衛眞縣
主簿嘗弃天台縣令以與予共學久之無以
衣食其妻子乃去補南康縣主簿會予召至
京師因留教授上方興學校以經術造士
予言君可教國子命且下而君死君所在學
者歸焉賢士大夫皆慕與之游然君寡合常

閉門治書唯與子言莫逆當熙寧初所謂質
直好義不爲利疚勢回而學不厭者予獨知
君而已君之死年四十有六實熙寧二年閏
十一月丁巳至四年二月壬申妻曾氏子綢
緼始克葬君南城縣禮教鄉長義里銘曰
安時所難學以爲已於呼鮮哉可謂君子

太常少卿分司南京沈公墓誌銘

皇祐三年十一月庚申太常少卿分司南京
錢塘沈公卒明年子披子括葬公邑龍居里
先公尚書之兆卜十月甲戌吉與其宗謀銘

則書公官壽行世來以請予論次其書曰沈氏自沈子逞以身屬社稷書於春秋文賢勞功名不曠史而武康之族尤獨顯於天下至公高祖始徙去自爲錢塘人大王父某當錢氏時匿不仕王父某官咸平端拱間至大理寺丞父某學行顯聞早世無爵位由長子同及公贈兵部尚書公諱周字望之少孤與其兄相踵爲進士起家掾漢陽從事高郵用舉者入大理爲丞監蘇州酒知簡之平泉縣縣人銘其政於石遂自封州守佐蘇州由蘇州

爲侍御史有以丞相指謁公者不爲聽居頃
之出刺潤州又刺泉州其爲治取簡易訟有
可已者輒諭以義使歸思之獄以故少泉州
舊多盜日暮市門盡閉禁民勿往來公至除
其禁而盜亦以止佐開封訟數年不遣者以
百數公斷治立盡嘗代其尹爭獄於上大臣
爲公自紂三司使請鑄大錢下其書議議者
無敢忤公爲其判官獨曰壞四錢爲可以當
十民盜變舊錢且盡鑄之爲誘民死耳不如
無鑄議上如公言於是天子以江東之按察

爲已悉聞公寬厚即以爲使盡歲無所劾而
部亦以治稱然公已老不樂事利權自請得
明州明年遂以分司歸第歸三月卒夫人許
氏六安縣君子兩男世其家一女子已嫁公
廉靜寬_貌和而內有守春秋七十四更十三
官而不一掛於法鄉黨故舊聞其歸則喜喪
哭之多哀而無一人恨望者銘曰

公生四方卒於故里先君之從祭則孫子有
擯有松有鬱其岡不阨不騫萬世之藏

尚書度支員外郎郭公墓誌銘

公諱維字仲逸少好學有大志年二十五起
爲泰州司理調泰眞二州判官以能聞監眞
州之酒稅丁母憂服除改著作佐郎知南豐
縣俗喜訟令始至豪猾輒名御事入縣察令能
否公至即得其妄窮而徙之由此無敢犯公
法改新都縣又以治稱旣去民思之相與繪
公像祠焉使者薦其材就知雅州王蒙正姻連
明肅太后家侵民田幾至百家有訴者更數
獄無敢直其事詔公治之其行也人爲公憚
公至則拔根擿節不漏毫末以田歸民蒙正

坐除名既歸天子目之賜之朱衣得尚書屯
田貲外郎知常州至州索宿姦數人流之州
以無事移提點淮南刑獄吏不治道聞公至
往往預以事求解部中肅然遷度支以卒慶
曆二年正月也凡仕二十七年公剛毅能斷
當事勇不自恤繇景德祥符之間四海平治
寬文法待吏而吏乃相習爲遨嬉浮沉者或
按一吏則交議群詆以爲暴刻生事日浸月
積而民敝於下矣至公始按吏而獨急於權
倖有大臣出鎮楊不治曲以禮事公公奏斥不

報旣代猶斥之以是被按一無憾言以聲威
聞而所至即有惠愛安石嘗驕游過常里中
民有以藝蓐語相罵者其長者怒曰爾欲忘郭
屯田邪蓋公在常以此治其民時卒已九年
矣猶不忘之惜乎朝廷方欲顯用而公已不
幸其出於治者猶未足以盡其志故不悉書
特掇其一二而存之此足以見公之志也祖
某不仕父某贈殿中丞母劉氏仙源縣太君
妻張氏南陽縣君子男三人先正烏江尉聰
正舉進士祥正星子主簿女六人以某年月

日葬公於某處公之里也將葬先正等以令
司封員外郎趙誠書來乞銘先人與公祥符
八年以進士起而子且與安石道近有好也
銘不敢讓銘曰

翼翼汾陽子儀始王德完道辟功蓋于唐宜
享世澤充如海長原原南寓孰嗣而昌公生
而明剛簡白洵拔身負韜誼不辱進蘇窮斥
姦惠立威振而年不長志不時盡旣奮旣材
天奚弗慙刻銘在幽來者之訊

都官郎中致仕周公墓誌銘



來攻君悉其卒三百以戰智高爲之少壯
夜君顧夫人取州印佩之使負其子以
明日賊必大至吾知不敵然不可以去汝留
死無爲也明日戰不勝遂抗賊以死於是君
年四十二兵馬監押馬貴者與卒三百人亦
皆死而無一人亡者初君戰時馬貴惶擾至
不能食飲君獨飽如平時至夜貴卧不能著
寢君即大斲比明而後寢夫死生之故亦大
矣而君所以處之如此嗚呼其於義與命可
謂能安之矣君死之後二日而州司理詎必